

之前聽聞政府話加大個煙包上面啲相，其實都有特別留意，因為我唔食煙都唔關我事，但早兩個星期見到啲議員講嘅嘢，真係忍唔住要講兩句，唔可以繼續做沉默嘅大多數。

其實加大張相，我以為都有乜爭議，大啲清楚啲，呢啲好人好事理應有乜議員反對，但事實竟然相反，不同派別嘅議員都好多意見，仲爭相話要幫煙草商發聲，話佢哋有位放自己個品牌，煙草商每年賺咁多錢，使乜咁多人幫佢發聲呢，佢哋有大大個律師團啦。其實政府就係想等佢哋冇得再放咁大個 logo 買廣告，又紅又綠又金又紫。

Common sense 都知啲圖畫越大越好，有議員話一半已夠，好搶眼，同樣道理的話，咁應該減少煙草商可以放 logo 的位置啦，而家一半太搶眼啦，即係俾佢賣廣告。又有議員話可唔可以加到 75%，唔係 85%，街市買餸咩？咁既然你贊成加大，咁又點解係 75%，唔係 89%、64%或者 71%呢？人哋政府就話跟 WHO，咁你又跟乜嘢標準呢？

最離譜係有議員話，仲未證實二手煙同癌症有關，而醫生護理界議員竟然唔糾正，仲加埋把咀話都要幫煙草商發聲。我有鼻敏感，其實唔使做實驗、做研究，都知道啲二手煙有幾毒，一吸就不停流鼻水，打乞嚏同咳.....

一名香港小市民